

四庫全書

集部

欽定四庫全書

集部

平橋叢卷二

詳校官庶吉士臣陳若霖

中書臣劉源溥覆勘

總校官中書臣朱鈐

校對官修撰臣戴衢亨

謄錄監生臣張紹昂

欽定四庫全書

集部六

平橋藁

別集類五明

提要

臣等謹案平橋藁十八卷明鄭文康撰文康

字時乂號介菴崑山人其先世徙自開封故

集中亦自署曰開封平橋者其所居地也登

正統戊辰進士釋褐後絕意仕進閉門講學

手定所作詩文為十八卷天順辛巳葉盛為

序而傳之舊板久佚康熙癸酉其裔孫起泓  
又為重刻凡詩五卷文十三卷文康篤志經  
史下筆頃刻千百言丹鉛矻矻雖病不少休  
其詩意主勸懲詞旨質直頗近擊壤集體而  
溫柔敦厚藹然可挹要不失為風人之遺文  
章亦不屑以修詞為工而質朴之中自中繩  
墨較其詩為尤勝朱彞尊以比之石介尹洙  
雖其所造之境地淺深不同而意度波瀾亦

庶幾近之者矣乾隆四十四年八月恭校上

總纂官臣紀昀陸錫熊臣孫士毅

總校官臣陸費墀



欽定四庫全書

平橋臺卷一

明 鄭文康 撰

古風

朝天頌

戊午年

纔辭南京館又踏南宮門下馬鴻臚報名姓早入大明  
朝至尊君門九重深幾許金殿瑤階淨如洗一朝忝作  
國家賓千載幸逢堯舜主皇仁浩如天皇智妙如神萬

幾獨斷合造化重瞳一視回陽春自古日月光或遺覆  
盆下所以田野臣尚多建言者我願一人聖六卿賢天  
地定位中外晏然天下書生無可言

梅雪詞

梅花兮條條白雪兮飄飄雖氣味兮頗異慨清白兮同  
高我思古人兮遠莫可招夢寐周公兮神魂相交懷好  
音兮鸞鳳附短翅於青霄

愛萱歌



萱葉何青青萱花何盈盈花繁識土沃葉盛由根萌霜  
臺有客雙瞳清愛花惟恐花飄零花前歌舞花下行繡  
衣光與花爭明我對花忘憂花向我欲語我心見花即  
歡樂花亦相迎共相與白日遲遲行流年遲遲過春歸  
花若老我心將奈何但願此花長在目老不遷官心亦  
足

弔宋靖州通守江公墓

宋靖州通守江公諱元字子明衢之開化人曾

祖袞朝散郎宗學博士贈通議大夫祖邦光文  
林郎衡州常寧令父藏國學奏名贈奉直大夫  
公開祐乙丑射策丙科授迪功郎臨安府仁和  
縣尉積官至通判靖州年六十六卒二孤長廷  
玉迪功郎潭州湘潭縣尉次廷圭將仕郎公疾  
革語二孤曰汪寇餘黨尚存崑山有母家可依  
等語二孤從治命乃以淳祐壬寅塋公崑山縣  
須浦之原此皆誌石所書今之墩頭尼菴是也

正統四年因築義塚誤發其藏好義者仍為掩  
之余聞而往弔焉乃按淳祐理宗年號也二年  
壬寅元成宗大德六年壬寅順帝至正二十二  
年壬寅至我明永樂二十年壬寅又至今歲已  
未三紀零十有七年通計一百九十七年文康  
記

崑南城外二里許叶一水遙遙是須浦浦旁有地名墩  
頭原是前人一杯土舊時土墩今已平鄉民尚喚墩頭

名何年創作尼僧院近日攻開長夜城城中主翁愁見  
日露出城門一方石大書深刻數十行爵里姓名明且白  
世家云是衢州人托體此邦依所親誰道歷年纔二百  
桑田變海海揚塵君不見南渡諸君何失德山陵盡付  
揚家賊三泉機弩亦徒然讀罷誌文三太息

瓶中紅梅

鮫人暗處馮夸國織出丹綃如血色龍王竊奪龍女譁  
破裂一聲飛作花鐵網千年沉海底網得珊瑚價無比

翦裁不用并州刀五出妝成三尺高  
舶商載歸凍不折入手火星彈指熱  
君不見驚人豈在紅顏子鼎味元生  
清白裏

瑞葵歌

青青階下葵曠曠階下花年年正炎天  
當階麗敏繁葩今年種葵舊時地開出  
奇花共稱瑞天生瑞物多為人君家有  
之非草異明年種葵者躡上青雲梯赤  
手奪得月中桂醉向瑞葵花下迷人傳  
瑞葵事我歌瑞葵歌瑞物

尚云少瑞人詎能多願君讀書作人瑞名與瑞葵同不磨

承恩頌

君恩重如山又若海水深臣軀等一羽承之詎能任薄才誤蒙收任使三載微勞何足齒玉音頒賜過褒嘉上及雙親下妻子恩從天上降明同日月光幽明思報苦無策但祝聖壽齊天長更願兒與孫盡為犬與馬為犬守宮牆為馬清塞野邊塵不動內廷安方遂區區感恩

者

送番禺趙御史并寄何太守

踈星墮江波鷄鳴曙光白驅車下長阪相送嶺南客  
客來一何遲客去一何迫來時雨雪交去路花盈陌  
為君折取河東柳情多更買河西酒人生傾蓋貴  
相得豈論結交新與久我歌當暫停君輪從此發  
離別雖一朝途程須兩月風流文采何荊州吳山  
楚水曾同游遙將十載相思夢附寄行囊付與收

虞啓東喪偶

朝露易為晞佳人難再得雖云壯士心誰能免悽惻侍  
郎有兒當少年讀書不減梁鴻賢一朝娶得孟家女十  
年撥斷琴中弦未賦白頭吟先歌綠珠怨入門空飲合  
盃杯結髮竟違偕老願白炊入夢事如何塋玉埋香泣  
素娥濕透青衫聲轉咽櫻桃樹下月明多

賦得短歌行送張一清

年年別家來上道天下名山半曾到能書能畫復能詩



彷彿潘郎少年貌雙瞳點漆髯如油步趨輕舉神仙流  
銷暑愛眠白薤簟禦寒長著黑貂裘錦囊一方色如土  
此物人看共稱古常時攜置行李中盛貯瑤琴共梅譜  
平生懶上侯門書等閒虛度三十餘恥逐山翁跨黃犢  
從教學士懸金魚往來厭殺人冢俗每向禪房伴僧宿  
竹窻啼鳥日三竿起沐尚嫌眠未足一奴雙鬟如處女  
脫卻方言學漢語客來烹茗爇爐薰禮節猶能動賓主  
湖海交游多義氣獨我兩人尤得意相逢握手對君言

自分我言君必記前年來醉蘇臺春去年去踏臨安塵  
今年春歸忽三載歲月無情多誤人莫戀江南春意早  
聞說金陵春更好買花沽酒須及時免使旁人笑將老

思養堂

鎮海衛指揮使武公政早喪父獨與母居追念  
死者不與生者同其祿以思養名堂開封鄭某  
探其情而為之歌

靈椿未老彫風霜音容一去空高堂堂陰萱草喜無恙

金英翠葉相輝光  
椿枯不復榮  
終天恨何極  
時憑夢魂  
中聊得見顏色  
賴此忘憂花  
歲久猶未衰  
花前稱壽花  
下拜愛花長  
與花相隨  
暮興羊棗思  
朝盡板輿樂  
北邙路雖遙  
西山日亦薄  
此心一日幾  
悲歡舞罷斑  
衣淚還落

題舟人吹笛圖

乙亥年客有持舟人吹笛圖求題者客因言太  
守昨日賞雪事因賦短歌書之

去年遭水潦今年復旱暵米價抵珍珠薪芻貴如炭壯  
夫饑餓盡成鬼水上漂流不可算舟行此經過傷心忍  
回首沿江人家拆屋賣拆去大間存小半且圖苟延今  
日命肯顧明朝與來旦夫棄妻兮母棄子兄弟誰能不  
分散幸我民性良寧死敢思亂皆賴朝廷福使我如堵安  
笛中吹出總民情笛裏淒涼眼盡經一曲未終雙淚落  
使君酒醒好來聽

思親詞

人皆有父我獨孤人皆有母我獨無此身不知竟何得  
白日堂上將誰呼我非本無父有父疽背殂我非本無  
母有母歸玄都百年哀怨不可極仰天俯地聲嗚嗚羹  
牆未易即夢寐還能通精靈會有期永矢相為從我願  
丹青手寫出平生面思誠在敬恭對此一方絹不須徐  
聲返魂香暮暮朝朝與相見

送沈秩下第還山中

沈郎讀書如好酒終日喃喃不停口愈醉愈貪滋味佳

半夜葩經猶在手沈郎作文如作畫萬象森羅同造化  
江湖鉅眼一見之爭致千金來問價讀書作文未足奇  
胸中抱負誰能知立心要做三代士不數漢唐羣小兒  
相逢俗客腰懶折共罵書生太豪傑我言沈郎不獨鐵  
作腰請看沈郎心腸都是鐵昨日當場選鄉試諸子競  
陳椒與桂滿前辛辣氣多烈掩却太羹玄酒味沈郎笑  
歌歸去來讀書更上山中臺人傳沈郎頗不樂我言此  
子器量非瓶罌勸君且暫居田野頗淵稱舜何人也來

科奪取黃金榜上元壓倒紛紛先進者

竹溪

竹溪之水清且漣竹溪之竹多如煙竹溪主人懶出仕  
三十躬耕溪上田借問竹溪何所在西望玉山東近海  
一都門戶五千家十代衣冠三百載城中有客過竹溪  
盡說王家風景奇風景雖奇何足數主人心事吾能知  
溪南溪北皆春水豈但樓船往來此種竹不種楊柳枝  
非畏旁人呼俗子古人滄浪歌濯纓濯纓為怕塵埃生主人

日日臨溪水要濯此心如鏡明竹林雖曰主人主常年  
亦聽都氓取掃葉為薪筍療饑貧寒開口何曾沮君不  
見七賢六逸風流師蘭亭修禊誇文辭煩君從事湯盤  
刻更讀少陵桃樹詩

同鈍菴諸公弔李侍御墓

樂菴江都人來作崑山客布衣三十餘言行皆道德王  
公名葆謚文毅雙眼如鏡明一見遂識人中英即令女弟侍

巾櫛不久竟成天下名州縣屢遷官臺閣薦膺職甘心



民事恤饑寒苦口君身論闕失一朝謝病解朝簪托身  
便築圓明菴自言臘月三十日散場似與禪和參哀哉  
三百年荒丘久無主猛欲問梅花梅花寂無語嗚呼白  
石爛滄海枯先生之名不可磨先生之名不可磨

其二

郭外東南隅行行僅六里土地頗高肥泉流亦甘美昔  
人愛此民風和王公薤露時來歌誰知興廢眼前事舊  
墳漸少新墳多楊生一鄉彥考槃在空谷官田時趁雨

中耕父書夜向燈前讀樂菴之墓屋東頭人物吾邦第  
一流楊生懷賢憫蕪穢有時歲事來恭修斯文在斯人  
斯人不可作我欲薦梅花梅花已零落嗚呼三尺法天  
下知先生之封誰敢夸先生之封誰敢夸

寄賀甫里嚴公寧五袞

嚴先生隱者流胸中五車汗爾牛星軺物色卒未遇布  
衣將老東南陬宅傍天隨子學恥平津侯眼空四海百  
不憂平生抱負誰與儔今年已半百蒼髮雙明眸客星

久不犯帝座壽星忽見孤南頭山中酒熟香可芻阿恒  
沉疴今又瘳銀篆盤鐵拄杖紛紛車馬來交游詩成醉  
飽飲未休我有一枝花贈君為壽壽伯玉知非年買臣  
富貴秋江水東馳無日夜蟠桃莫信癡兒偷要將忠孝  
名長留

題張志和恒軒

一壺懸掛閭門市不學壺公隱名字手持百藥親吟咀  
調合君臣并佐使三因六氣將無同七表八裏誠難工

診療時施七勺力笑談坐取十全功問君神巧何能爾  
家法相傳有微旨利心不守守恒心起死回生端在此  
嗚呼民病全憑州縣治州縣幾人識恒字頌君磨礪古  
砭鍼鍼起貪頑作良吏

送人歸養

朝上北闕書暮登南歸途朝陽無意逐鳴鳳私情但願  
為慈烏軒車百輛清酒百壺彼何人斯中朝大夫送爾  
孝子還姑蘇君王今日恩上如天覆下如地鋪生死肉

骨甦焦枯升堂母子重相見一家拜舞齊山呼

白雲窩

山中白雲白於月山中美人清且潔一窩小小在雲深  
高臥白雲如臥雪朝煮雲為食暮翦雲為衣美人不來  
亦不機長年飽暖無寒飢下視塵界如汙渠我願山中人  
暫舍山中窩乘彼白雲游上都相隨紅雲捧帝座手招  
天上青雲徒共為霖雨遍寰區要見滿眼黃雲鋪要聽  
滿耳歌唐虞此時還山尋故吾收歛神功寂如無吁嗟

白雲之窩名不磨

朱絃詞

我琴有絃我絃孔朱得之尚記結髮時入指聲琳琅照  
眼光陸離朝朝暮暮長相隨房中奏之無不合家人聽  
之無不宜無何三十年忽爾中絕東與西合歡曲連理  
枝一朝變作淒涼詞鸞膠不可致歲暮無還期朱絃朱  
絃兮繫我思安得新絃兮差似之

陳孝子

四川巴人

僑寓京城陳孝子昏夜擊人誤傷死讐家擒父入秋臺  
鍛鍊獄成將棄市孝子寃聲如怒雷殺人者我親手為  
陳情伏闕獻天子勿刑臣父當刑兒天子臨軒觀奏劄  
念此誤傷非故殺況能求死代親身特命充軍饒重法  
古來孝行能動天開平之行無一年重逢恩宥還鄉里  
不是皇天誰使然天意君恩須記取刻骨銘心宜自許  
知君今日不忘親他日臨危肯忘主

孫孝子

滁人

孫孝子遺腹兒生辰孤苦何其奇三年舅奪母志去父  
踪父影茫無知人有孝心天肯負舊篋公文天所護此  
中遺事宛然存方知父死邊城路孝子看來悲復喜和  
淚和愁戒行李彷徨匍匐向南奔瘴雨蠻煙七千里廣  
西山川浩如海况復丘陵幾遷改累累相似一何多知  
爾荒墳竟安在紛紛異夢來冥冥冥冥之中殊有靈一  
朝忽得一抔土鶴骨深藏元姓丁共言試骨當試血骨  
肉相投疑可決孫郎瀝指血如川漬入骨中紅不滅孝



子歡聲震若雷解衣包骨抱歸來南寧郡裏新風景添  
得孫郎哭父臺

俗禮歌

有序

崑俗娶婦俗禮可嗤者甚多若所謂跨鞍問龍  
進寶樓飯甌傳彩之類是也考之禮書一無所  
據不知自何時何人始耶今士大夫家不審  
是非妄而行之畧不怪恥尚何罪於愚夫愚婦  
波頹草偃者乎至若討喜一事言之汚人齒頰

此壻家以賊道待婦與婦之父母也瀆禮不經  
莫此為甚余為膏兒畢姻醮子親迎交拜合巹  
之外非禮之禮一切屏絕鄰姬里媼有不樂者  
驚聞駭問嗚呼名為士大夫者既不能行古禮  
一二以示人安忍蹈時俗之弊為其口實乎病  
中無事因其名而采其義各成短歌一章以曉  
之吾輩中能同心革罷亦移風易俗之一端也  
莫跨鞍

新婦未到之先壻家設馬鞍於正門限上婦出  
轎令跨以入俗傳要平安須跨鞍也作莫跨鞍  
莫跨鞍莫跨鞍跨鞍未必家平安鞍高足小跨不過露  
出繡鞋人共看東家娶婦有鞍跨西家無鞍爭笑話誰  
知一跨心膽麤亂走胡行都不怕嗚呼跨鞍不如不跨  
好俗禮紛紛奚足道

莫問龍

新婦到門其姑用染紅燈草三然火在熨斗內

兩手執其柄又一人持大鏡一面同前問曰新婦何方來婦之從者答曰旺方來又問何龍入宅答曰寶龍入宅問已姑退而婦進謂之問龍作莫問龍

莫問龍莫問龍問龍龍在龍窟中掀天頭角役雷火引入宅來何處容總使寶龍能帶寶誰解降龍與龍討只有煌煌領下珠者得貪夫眼中飽嗚呼寶龍豈是池中物肯逐婦人同入宅

莫進寶

新婦入門問龍已畢其姑隨其家之所有或持  
白金一錠或持酒器一件與婦持入上堂復納  
還與姑謂之進寶作莫進寶

莫進寶莫進寶進寶書中無可考婦家有寶當自進借  
取夫家亦何好古人真實真可憐今人假寶徒紛然婦  
人孝順是真實進與舅姑無價錢嗚呼寶兮寶兮無爾  
獻三日入厨來進膳

莫摟飯甑

新婦從堂入厨庖丁用飯一升捏成銀錠模樣  
以瓦甑盛之上覆以巾令婦開巾以筯摟開謂  
之摟飯甑作莫摟飯甑

莫摟飯甑莫摟飯甑飯甑破時如破鏡甑裏深藏是何  
物摟出捏成假銀錠甑雖有眼喜無口入得門來便教  
摟少年新婦恃力强故向人前擎好手嗚呼莫教甑破  
不可為曰中免使良人炊

莫傳綵

新婦從堂入厨自厨入房家人以草席兩條布  
地號曰龍鬚席一卷一舒令婦步行其上贊者  
前唱賀新郎引導進房徹席不用謂之傳綵作  
莫傳綵

莫傳綵莫傳綵兩席相傳禮安在媒婆前引伴婆隨傳  
入洞房齊唱采人家娶婦在傳家不在容顏如舜華前  
席舒開後席卷呼作龍鬚徒爾誇嗚呼新郎有綵莫鋪

地留製斑衣老來戲

平橋藁卷一



欽定四庫全書

平橋藁卷二

明 鄭文康 撰

五言古

田家作

壠上有良田山中有茅廬良田供歲計茅廬足安居朝  
出事耕作暮歸讀詩書涼濯茂樹陰飯罩清溪魚秋高  
納禾稼霜寒采薪樗三時力頗勞卒歲心還舒田廬固

荒陋父祖遺業餘世守知幾年承傳今在予追念先人  
艱豈易成菑畲雖云一方土重若瓊瑤琚我今享厚獲  
詎敢忘當初地偏夢寐熟志靜思慮虛明月至皎皎清  
風亦徐徐鶩鴨惱比鄰桑麻遍村墟舊穀歲屢陳新酒  
時常醺券許貧姬貸飲召鄰翁俱迂懶自成癖禮法誰  
嫌疎有心務本業無意干名譽韋布幸麤安矧敢懷軒  
車穢矣郭霸糞哀哉范增疽長歌畎畝中此樂當何如

趙進士夢萱堂

慈母辭北堂季子恨何極托彼堂下花對此長相憶俯  
羹不可見面牆竟誰即昨夜夢魂中分明見顏色覺來  
獨遑遑陰風邊塞黑

義井

鑿地得清泉泉香甘若醴入口齒牙寒煩蒸淨如洗百  
轉輓轡聲主恩深到底

義橋

伐木架危梁民無病涉者砥柱樹中流行人來四野渡

蟻尚多功茲勞豈云寡

落齒

余年四十有九牙齒漸脫俗謂痞疳因考韓文  
公落齒詩年纔三十六歲時為監察御史其詩  
曰去年落一牙今年落一齒俄然落六七落勢  
殊未已餘存皆動搖盡落應始止憶初落一時  
但念豁可恥及至落二三始憂衰即死每一將  
落時凜凜恒在已又牙妨食物顛倒怯嗽水終

焉捨我落意與崩山比今來落既熟見落空相  
似餘存二十餘次第知落矣倘常歲落一自足  
支兩紀如其落併空與漸亦同指人言齒之落  
壽命理難恃我言生有涯長短俱死爾人言齒  
之豁左右驚諦視我言莊周云鷺鴈各有喜語  
訛默固好嚼廢軟還美因歌遂成詩持用詫妻  
子用韻記述非曰敢和

退之未四十俄落六七齒作詩十八韻付之不得已余

生忝為士隱獨慎動止視父固不肖行已頗有恥夙懷  
心腹疾久待旦晚死臨鏡照面目自疑不是已去年冬  
至夜節氣冷於水一齒忽焉落易與拔毛比旁者皆動  
搖參差不相似今年落漸多年者無幾矣譬彼熟瓜蒂  
誰能強經紀嚼物苦及齧剔塞敢勞指糜粥與豈液百  
物此可恃自念始半百老態遽若爾親賓愛莫助候問  
空驚視情至亦可傷理明聊復喜天地有時老紅顏豈  
常美何以慰我懷願有讀書子

秋夜宿山中分題詩四首

分得紗帳

禪牀淨如洗，紗厨亦清素。  
質比蛟綃輕，色與狐腋妬。  
聊爾蔽蚊蚋，誰言障風露。  
鉤懸鐘響晉，朝窻掩日夕。  
暮不用墜流蘇，爐香自來度。

分得布被

木棉非繭絲，麤厚亦難壞。  
裁成七尺被，一幅三縫界。  
公孫富飾詐，老衲貧忍賣。  
垢汲澗泉澣，晴掛松樹曬。  
時或

禮如來橫鋪共膜拜

分得蒲團

良工斬澤蒲編織同屨捆外圓似多智中充如有本跣  
跌僧入定狼藉客醉混坐馬恐奔逸乘車防覆損獨有  
山中禪長年占安穩

分得藤枕

肌膚擅清涼骨格負剛毅上帶刀斧痕中多黑甜味藉  
首睡至卯攤飯枕過未不霑脂粉香頗有蔬笋氣啗彼



邯鄲翁榮華片時貴

匿名書

匿名書穿窬伏梁之徒之造言也朝廷嚴立禁約律著令絞近有以區區姓名投諸里巷之牆以余不臧得罪於異已之人固不足怪向年南昌況公鍾守蘇日有投於門於堂於室者公笑曰汝敢投吾面乎公自處固是論以聖學似失反已之道余故作詩以見志焉

友道尚忠告何為投匿名過愆得昭告自新路能行余  
生信多畏畏天尤戰兢舉目見神電側耳聞轟霆口有  
愚直言勢無趨附情獲咎或在斯辱教知自懲君當勿  
復作國典有明刑

饗餘菴竹石

七首

父族本南山母家在湘水生兒有重質清風滿人耳共  
言弗簫韶終當柱下史

歲改色不易世遠質難糜氣與霜雪競壽與天地俱丈

夫在比德焉能較微軀

衛風興歌德大易亦言介德者壽之基介內斯介外此  
志諒弗渝吾心久云泰

神禹斧鑿舊湘妃淚痕鮮天地亦有窮萬物終化遷但  
當遺形迹留與作者傳

此君君共稱丈人人亦拜呼君復呼丈尊異無或怪聲  
聞若踰情誰能永多賴

嶰谷有佳種荆山多異姿路遠人力難造進不可遲一

朝幸入手夕死復何辭

踈篁非楚材白石豈荆璞一備任公竿一充鶴鳴錯微  
物尚多庸余生久淪落

贈客

逸羽戀岑蔚潛鱗樂深廣既無繒璫虞且復遠罟網錦  
城固多樹龍門亦堪上所處已云適何煩起遐想笑歌  
北山文雲林振清響

夢夏存良員外

存良豪傑士二十登巍科功名與詞翰夙夜心靡他朝  
士紛如雲入眼苦不多謙謙義興尹弼誓言為蘭頗南  
宮新陟階東廣已違和十年腹中書埋沒荒山阿孤兒  
托世父寡妻依病姑顓臾未足憂蕭牆起風波區區蝸  
角上白石尋干戈遂令萱荆詩存良有母子兄弟翻成  
長恨歌質成遇匪人哀哉淚滂沱

陳處士夫婦同日逝

潁川陳處士年八十六與其配俞同日歿事具

臨川吳餘慶志

出世不同年謝世却同日同心結生前同歸在茲夕不作  
枝連理定作鳥比翼翼異彼中道者去化山上石紀載良  
可書相期永無逸

挽范葦齋

葦齋奇男子可望不可羈平生負孝義斷斷無乖離壯  
年事文藝出入黃金閨供奉三十載屢將榮遇辭建安  
最許可東里尤相知蕭然一儒冠朝野瞻容儀直道老

彌堅清節貧弗移  
皜皜方寸地殷勤付佳兒  
念茲不可作淚灑墳前碑

雲林卷

身在雲林下心在雲林  
外林深白雲冷荷衣不堪賴  
牛羊滿田野風露夜未艾  
清境固朝夕幽懷豈能泰

送范義莊北上

北風吹高林衆樹枝皆鳴  
嚴霜遍郊野宿草已彫零  
寒氣日夕烈水澤成堅冰  
迢迢彭城驛舟膠不能行  
登車

金少府集卷二  
走曠遠輪轉煙塵生後山忽相送前山又來迎問程借  
宵炊聽鷄候晨興綿袍勿嫌厚邨酤宜自傾壯遊豈不  
歡況復觀光榮但念夙昔好歲晚難為情

其二

元昊有事日尊公在西陲有謀者三人負氣不受羈薄  
遊塞上觀經畧能自期長嘯示已志賦就崆峒詩欲獻  
恥自售不獻無由知於焉礮大石鐵筆寫其詞壯夫拽  
以行三人哭相隨尊公忽有聞驚問何其奇召之與相



見欲用還躊躇一人雖肯留兩人竟西馳尊公恐失士  
亟令急騎追追之不復返吳也倚為師家屬在隨州官  
司重羈縻一朝遣間諜矯詔來釋之作樂笑迎去吾曹  
被其紿連兵十餘年職此兩人為茲事載雜籍將信還  
將疑君行遇西士為我問當時

七言古

分得錢塘候潮送客還溫州

錢塘江流平似掌雲散海門潮未上村鷄啼遍四郊聲

淡月踈星尚微朗  
帆檣滿目紛如麻  
候潮同坐江頭沙  
近郭鐘聲識僧寺  
隔江燈影是誰家  
衆中有客相依並  
訪我里居兼問姓  
自言家住樂清邑  
從小讀書期待聘  
先君舊日事文皇  
朝朝暮暮趨明光  
畫筆當朝推第一  
房山北苑皆尋常  
內外交遊多俊傑  
老大逢人猶折節  
一朝仕路各東西  
兩地書郵俱斷絕  
當時一人最知己  
道義忘形是君子  
年來宦寓在崑山  
曾致緘書託雙鯉  
囊琴載鶴遙相過  
舊情不減新情多  
花前對酒頻教醉

月底談詩屢聽歌傾倒離懷將一月上道南還天正熱  
衆山拱揖俯臨吳一水迢遙曲通浙蘇杭相去五日程  
野花啼鳥如來迎前宵夢斷松陵驛昨日帆過攜李城  
夜來棲泊依林樾醉沐江風灑毛髮鄉心一片不容眠  
早起候潮將曉發須臾語罷潮已來舟船盡向江心開  
行到江南望江北欲付相思潮寄回

廬墓兒

神塘山陽敬亭北三尺高墳土花澀戚容滿面誰家兒

向客未言先掩泣自言生身纔八月黃口呱呱流乳汁  
可憐兒父在鬼簿催赴泉臺趨令急此時阿母方始嫁  
綠鬢紅顏踰二十一朝忽作未亡人無意獨生判絕粒  
哭夫橫抱似夫兒夫業有兒還可葺如悲飲恨度朝暮  
鏡鳳釵都什籠瀾翻劉向列女傳手寫共姜詩暗習寒  
燈不厭翦刀冷暑夜勤將麻縷緝共嘲壯夫既夭折弱  
稚那能保成立朱門衆子多下流況爾寡妻何所及母  
志堅持肯少動覆水難收終要拾八齡即遣就外傳髮

官雙鬟驅負爰束修累歲力經營筆劄隨時苦供給三餐同咬菜根飯井臼甘勞費躬執叮嚀告誡言滿耳一日辛酸幾回集從此操危又慮深幸爾成人在鄉邑母能守節兒讀書歡若卑官轉崇級百年光景等須臾思報慈恩心汲汲誰知此念竟虛負母命云殂斷呼吸籲天叩地了莫聞猛欲下從無路入空將兩眼帶血淚灑浸松根土痕濕田間來取蓼與荼覆得新菴大如笠海枯石爛繫哀思何日何年忘鬱悵我聞此言亦悽慘下

馬墳前頻慰揖為免作歌兒謂誰關西孫子其名仍

松竹篇

徂徠之山山有靈四時秀氣陰冥冥中產古松高百尺  
頭角怪異非凡形逢時開花吐香雪一寸堅心一方鐵  
嚴霜烈日不改顏風雨惟聞聲激切夢中肯上丁公腹  
浪遊之封徒自辱養成良藥在深根要與蒼生濟憚獨  
平生知己獨此君此君乃是虛心人直節畧施何晏粉  
清標不污元規塵般儻伶倫俱未來相逢盡說非良材

誰知老天有深意暗施雨露加滋培一朝使者輶車動  
有司取赴明廷貢自緣生長草萊中不是朝家遲爾用

姚江草堂

草堂舊在姚江滸門對清流列環堵明憲淨几似仙家  
中有佳人服勤苦養高懶去干州縣十載將心攻筆硯  
興來不賦散人歌閒時只讀功臣傳珠璣文繡撐心胸  
袖攜長策朝重瞳丹墀獨對五十字羣英誰敢爭前鋒  
長安陌上恩榮日從此金門遂通籍青春衣繡入烏臺

寒卻當年讀書席客邊  
日夜長相思別來庭樹生孫  
枝清泉白石畫中景涼風疎  
雨燈前詩有時高望添惆  
悵夢魂飛到姚江上千樹桃  
花幾度紅半庭芳草元無  
恙去年懷歸奏明主曉叩天  
闕聽天語鑑湖賜與賀知  
章一棹南還特相許嘯歌重  
上江邊堂藤花落地莓苔  
香紗帽籠頭作堂主坐令蓬  
華增輝光尋踪訪舊多  
零落只有青山宛如昨雖云  
田野久荒蕪且喜松篁未  
蕭索未歸長憶故園春到  
得家來興已分不為草堂無



樂趣此心一飯敢忘君

題劉氏世榮堂

永豐劉傑希秀舉進士而授官有年自鼻祖省  
元至高曾而下代有顯者道德節義滿人口耳  
予采其實題其世榮堂使讀者知劉氏之榮在  
此不在彼也

昔人文獻稱西江西江人物多淳龐山川降神豈無意  
生賢用世資家邦君家舊居鷺溪裏儒業相承近誰

比清風高節滿前朝盛德豐功載良史省元奮發開後  
昆百年子姓俱蘭蓀東亭先生德尤厚天畀令器如溟  
鴟令器為誰諱鴟者早歲詞章播朝野外藩中祕屢遷  
官隨把丹衷向君寫可憐末路逢坎坷平時草野皆干  
戈間關奉命守韶郡撫輯能使民心和無何又掛將軍  
印駐節邊疆靖邊釁忠肝義膽付天知婢膝奴顏恥時  
擯元阼將湮不敢續大厦支傾非一木俯知時勢兩難  
為坐取文山傳來讀從容賦就絕筆詩英魂暗逐旌旗

飛舍身下從巡與遠三軍血淚齊沾衣仁聲不減泰華  
重凜凜孤忠鬼神誦心田一片無寸瑕留與後人耕且種  
太學儒生乃其嗣東陽明府為孫子詩書浸漬卒有獲  
仁義栽培允堪恃熙朝啓運億萬年大開科目羅英賢  
一時君家五兄弟齊驅並駕相爭先累世榮通世非少  
名節多虧無足道孰似言言百尺堂蒂固根深不傾倒  
瓊枝玉樹新成行後來門戶將尤昌僭題長句慶私幸  
還期過爾瞻輝光

烈女陳若英

烈女陳若英瑞州高安人受靖安舒璉之聘璉  
卒若英自經死時年一十九

妾生未識檀郎面妾貌檀郎未容見兩家名姓各相聞  
妾始加笄郎突弁阿翁讀書官作郎兒郎從之親筆硯  
寒燈暑帳不辭勞飽學醉經將領薦阿翁遷官向南返  
子父相隨共家眷淮陰城下驛亭邊誰料因緣事成變  
珊瑚枝向掌中折道上人看淚如霰青天白日愁無光

野魅山妖寒欲顛  
銘旌高表異鄉魄  
襦袴空留慈母線  
妾家遙隔西江水  
計入深閨心膽戰  
不知眼底有人間  
望近黃泉離一箭  
橫揮郎家雙股釵  
勇繫蘭房三尺練  
但求同化穴中土  
肯作孤棲梁上燕  
從容頃刻畢此身  
烈烈清風湖海遍  
乃知天性無古今  
堯舜塗人同一善  
請歌女子若英詩  
莫看太師長樂傳

與葉及菴論商山四皓

高皇暮年將易儲  
期期御史強沮之  
留侯從容肯直諫

公義定滅宮幃私斯人平生仗多智預卜將來有人薊  
功成謹縮三寸舌推禍與人圖自避吁嗟四老真猷夫  
等閒誘出如嬰鵲雖令太子生羽翼亦使悍后為屠奴  
先王一姬并一子一朝盡向砧刀死他年又召諸呂來此  
禍皆從老人始

讀倥侗子補劉龍洲小傳用陳亮韻

龍洲巨眼雙垂虹四海一望都成空有時痛發賈生哭  
血淚迸落珍珠紅初心甘老山中酒寢不成眠亦須走

東南日月欲墮地渡江思顯擎天手洛陽田地本中原  
還我輿圖舊時有胸中十萬總兵器用夏變夷期可致  
從來好事苦多違十常八九難如意五國城頭雙臥龍  
中興懸望商高宗區區泗上一亭長仗劍猶能歌大風  
正爾艱難傷國步堪歎滿朝皆妾婦先將此輩酒飯囊  
大車來載斗來量此心未遂身先死卻把并州作故鄉

朱氏雙節

進士朱鉉二母早寡不嫁號曰雙節賦以贈之

霜華夜度湘簾影玉兔寒沉簾外井孤燈雙婦抱雙兒  
淚結紅冰濕衣冷太阿出冶火星熱鋒鉞射人肝膽裂  
誰知兩點少年心同化堅貞一方鐵

送錦衣劉公子往南京

殘月鷄聲曙光白寶劍金鞭帶行色綠楊堤上紫騮嘶  
一道風煙向南國南國繁華莫久留歸來重整舊弓裘  
君家世沐恩波厚好斬樓蘭早拜侯

平橋藁卷二



欽定四庫全書

集部  
平橋葉卷三  
四

詳校官庶吉士<sub>臣</sub>陳若霖

中書<sub>臣</sub>劉源溥覆勘

總校官中書<sub>臣</sub>朱 鈐

校對官修撰<sub>臣</sub>戴衢亨

謄錄監生<sub>臣</sub>張紹鼎

欽定四庫全書

平橋藁卷三

明 鄭文康 撰

五言絕

戊辰元日

京國新元日隨朝入紫宸  
雙親故山下稱壽是何人

曙鵲

霜冷曉星高  
羣鵲近九霄  
禁城鐘鼓動  
環繞似隨朝

思友

對雨思君子胸中萬卷書知心非一日有志作真儒

白髮

火熾撲難滅波頽防亦傾鏡中新白髮三物總無情

讀李太白詩集

白髮三千丈秋來日夜生汪倫忽相見無語各含情

畫冊四景

浦濶帆如馬歸心猶厭遲莫因順風裏忘却逆風時

水獺荷花下鷺鷥荷葉邊漁舟更數罟誰為小魚憐  
橋上月如畫魚罾收未曾清光且遲轉留作小家燈  
雪霽景如畫幾家詩酒歡誰知白屋下連日有飢寒

太常卿夏公仲昭進階從二品時年七十七

雲鶴上羅衣犀鞶映壽眉年高喜身健恩重覺行遲  
偶憶芮明府朱商潛彭水竹范淞南四老遺事

去縣日已久威風尚爾寒城中舊豪猾不敢舉頭看  
片玉曾誇我牽絲許問名雁書來報晚耿耿幼時情

寡嫂多風節門如法吏家小郎空好事不為表貞嘉  
雙目老來瞽深衣實稱情年年鄉飲酒不忝大賓名

自喜

自喜平橋路橋平路不斜若論往來久誰得似寒家

其二

自喜傳家物傳家有舊編當時修譜者特記孝宗年

七言絕

元夕

東家火樹夜光飄  
堂上春寒向晚消  
楚舞吳歌盈耳目  
千金一刻度良宵

宿車塘張氏館

縣城寒漏雨中沉  
江館無人醉擁衾  
年少書生豈陶穀  
肯因一笑費千金

題趙仲穆出獵圖

駿馬胡鷹萬里天  
飛塵一道暗如煙  
清平正好調弓馬  
莫為從禽學少年

山齋

山齋無事樂忘飢  
姓氏何須太守知  
有客叩門驚犬吠  
若非求藥定求詩

新酒初熟約徐寬共嘗候久不至

羣鴉飛盡月黃昏  
不見人來共酒樽  
坐久隔牆聞犬吠  
桂花香裏又開門

夏日讀書樹下

高樹涼風落翠陰  
古詩三百治平音  
壯年且盡雙瞳力

莫為功名易動心

漁樵問答

妻子同舟釣浪花  
曉行淮浦暮長沙  
采薪只在深山裏  
得似江湖處處家

擔頭春酒一瓢多  
樹底看山樹底過  
謾說江湖妻子樂  
幾人失脚在風波

和曾刑部韻

曾習江西泰和人  
訓導崑山兄  
顰任刑部郎中



以詩寄至習邀余同和

杜陵花竹怨離居  
驛使遙傳日下書  
啼斷西風原上鳥  
海天愁思正紛如

詠鶴

丹頂玄裳雪羽衣  
水邊石上最相宜  
清高不入樊籠裏  
只許仙人渡海騎

寄徐叶祥

南州高士有佳兒  
清節雖貧亦自持  
閉戶讀書多歲月

不將名姓向人知

春園

柳眼茶芽總未抽  
滿天雲意叫寒鳩  
轆轤罷轉人蹤靜  
不是春天是晚秋

刺牡丹

名花不入小家園  
歲歲花時沸管絃  
只恐春風容易過  
鄰翁耕作種瓜田

客中聞弟病

家書無雁到京遲  
兩月沉疴近始知  
莫是勞心思遠客  
夜牕多誦鵲鴝詩

貧兒

哀哀枕上淚成冰  
哭入長更不忍聽  
子母同眠猶較可  
阿婆獨宿更零丁

寄海上韓杲

一紙相思托便鱗  
客鄉人寄故鄉人  
看花深憶山中樂  
只恐歸遲不見春

其二

行盡清溪到水涯  
好山環繞故人家  
寥寥一大柴門外  
只隔橋東幾樹花

送洪彥章致仕還括蒼

壯年遊宦晚年休  
落盡紅顏漸白頭  
別卻江湖風浪險  
扁舟歸去入安流

題西溪書舍倒用韻

東家歌舞隔花陰  
日夜歡情似海深  
獨有西溪隱君子

金川集卷三  
一編探盡聖賢心

富貴功名不動心  
數椽遙在百花深  
先人手種庭前樹  
長得孫枝滿地陰

題靜室

靜中風月靜中身  
不見長安市上塵  
自分封侯無骨相  
只應終老作閒人

其二

饑采松苓渴飲泉  
靜中最喜日如年  
衣冠不接閒賓客

只向詩書接聖賢

玉立亭

前元時崑山王君祐有玉立亭會稽楊廉夫嘗  
飲其中題詩曰王郎崑之秀玉立而長身亭子  
如筮大不直一欠伸亭前千尺峯倒影入水濱  
燒琴有爨桐漉酒有烏巾客來塞屋破露坐草  
上茵時時來鐵叟共酌羅浮春題曰令小朶雲  
捧硯為賦此章君祐之宗孫益復亭其地予亦

為賦二絕云

亭中曾寫鐵仙詩人去亭荒碧草滋千尺危峯今尚在  
重來磨洗認當時

其二

玉立長身舊主君百年遺事至今聞宗孫賓客還如舊  
只欠楊君小朶雲

與謝素菴酌酒

宣德十年乙卯冬余與朱珏同山陰蔣西齋以

公事赴蘇州假館謝素菴宅有夏顯者崑山狂人酒醉不知何從來語言半莫可了道遇郡人伊侃士剛邀其同過素菴士剛予友也美丰姿顯強其就寢士剛亦欣然從之時夜頗寒素菴家甚貧私念枕衾不備指其逸去顯即使酒大怒發罵四鄰驚問西齋撫慰不解素菴內君畏伏不敢喘息漏下三鼓顯不別而逃明年士剛登進士第擢工科給事中再明年余亦第是歲



顯以好酒亡又三年士剛在京因忿死素菴內君  
亦物故後二十年為景泰五年正月十七日素  
菴見過酒中偶道及此歷歷如昨日事不勝存  
歿之感西齋告休在家尚無恙今已八十一歲素  
菴六十四歲珪四十七歲予少四歲文康識

卅年易過似流星對酒憐君已暮齡舊事淒涼半陳蹟  
一場春夢不堪聽

甲戌歲

景泰五年

隴頭一夜雪平城海口潮來水就冰百歲老人都解說  
眼中從小不曾經

吾崑高年者頗多唐子華年九十歲陳德剛年八  
十九歲歸叔度年八十六歲朱士栗年八十歲  
諸老皆強健能言

晨興

一宵酣睡不曾醒忽見東牕日已明自笑起遲非中酒  
為無人解報鷄鳴

藥名詩贈鄭完

藥名詩始於唐張籍有江臯歲暮相逢地黃葉  
霜寒半下枝句宋元來亦有作者永樂初曾狀  
元在翰林有十首多寫幽思之情有半生空帶  
宜男草遠客當歸尚未還又石髓難將補骨脂  
乳香消滅見青皮句膾炙人口蔣恭靖集中有  
八首皆述已懷其言曰莫道衰殘能獨活丹砂  
曾遇葛仙翁又曰人言此老當歸去總得回鄉

已白頭題曰和翰林鄒仲熙韻想一時唱和必  
尚有人也蘄陽尊生鄭侯作宰吾崑三年其子  
完來省親平生最愛曾公藥名詩行坐詠歌似  
有膏馥霑染其齒舌間亦其嗜好是在是也今因  
其還相祖道上采甘八味綴四首送之

草果堆盤酒滿觴羹調五味鬱金香誰言沒藥延親壽  
煉得靈砂貫衆方

使君有子正烏頭雙眼空青氣伏牛半夏裏來知母健

忍冬歸去亦忘憂

有客回鄉賦白駒怕將蒼苔混珍珠道園藁本君家刻  
只載車前百部書

紫苑彫殘百草霜醉騎海馬送賓郎紅娘敲折金釵股  
笑對王孫續斷腔

送馬紹榮補學官弟子

有客新從泮水游誓將刀筆換公侯若非正學叨封拜  
終落功名第二籌

其二

臨軒天子覓真儒  
邸國遺編第一書  
君去盡心須盡讀  
好攜十傳赴公車

安閒

脫却朝衫製芰荷  
芙蓉亭上嘯還歌  
生來骨相知輕賤  
長得安閒幸已多

喚渡

渡頭風急水生波  
客路歸心向晚多  
喚出小舟行不上

隔江無奈雨來何

其二

白浪浮空散作花  
蕩舟食力度年華  
行人不用愁風雨  
過得江來似到家

觀燒劫圖

元僧有提點  
昌都事燒劫事在至正間  
邑人葉秀實上燒劫圖  
副現藏五世孫都給事中盛家  
詳具王尚書直傳

福嚴寺裏禿鷲兒不豎旛幢豎賊旗白晝殺人憑佛力  
嚴沙溝變火坑池

其二

燒劫誰能作畫圖南陽壯士手親摹官兵一出髡郎死  
滿縣歌聲聽鷓鴣

題雜畫

題古今雜畫詩頗多悉棄弗錄獨於史事用已  
意寓勸懲者存之得十八首



直道難容竟獨歸  
離騷賦罷淚沾衣  
魂靈不逐湘流逝  
還向懷王殿上飛

自古含容解弭災  
將軍從此負荊來  
早知一飯三遺矢  
悔不當初謝郭開

纔逢生客便呼郎  
仙女風情想未忘  
莫笑思家輕出洞  
家中自有舊糟糠

恨無顧愷刺心鍼  
擔負風流仗酒醺  
誰料鄰家機上女  
懷春不似卓文君

追憶蒲鞭漢大夫撲刑雖用得完膚卻憐東魯臧孫氏  
不去鞭蒲去織蒲

壯士輕生易許人圖謀未遂已亡身明知一去無還理  
底事狂歌竟入秦

弱水蓬山幾萬重仙宮未必勝秦宮君王輕聽齊人語  
空駕樓船入海中

史傳荒唐怪事多乘槎那得上天河不知織女支機石  
遺落人間竟若何

讀罷司徒一紙書北軍門外報鑾輿君王若問平時釣  
不釣功名只釣魚

白日豪奴擅殺人生擒不避主家嗔最憐文叔行柔道  
容得當時強項臣

長營兵甲似雲屯號令曾聞過至尊他日淒涼廷尉獄  
獄門無復似轅門

會稽太守駕行軒山叟龍鍾立道邊買得千金聲價重  
臨行只用一文錢

負擔行歌過古墳故妻猶是飯王孫他年一見呼同載  
不念前情念後恩

一入沙場與漢辭節旄落盡髻成絲生降得似生還樂  
腸斷河梁五字詩

曾奪麻池厭老拳十年深抱死生冤石郎亦是英雄客  
握手平生不諱言

強臣欲竊晉山河萬騎西來奈爾何此日新亭迎候者  
侍中不及謝安多

伴食空居政事堂死時惟剩一空囊家中留得蒼頭在  
自鬻身錢辦主喪

嫁女惟愁致客難君王詔遣共交歡誰知後日生兒樂  
虛授朝廷五品官

壽徐老翁

還丹九轉解延齡不及心丹更有靈三戒從來是良藥  
養生須讀素王經

其二

年登七十無老態歲歲壽星光射秋王母蟠桃不須獻  
醉呼方朔自來偷

擬張允懷寄內代內答

南京張允懷舍家遊江湖十年一日作寄內并  
代內答詩各五絕曲盡幽怨情狀似有翻然改  
悟賦歸之意余恐其既作復止言之而不果也  
亦各擬五首促之

年年曾寄客邊書寫盡真情只當虛十紙到家無一答

恨人心性願消除

故園歸計屢蹉跎不是狂夫薄倖多山鳥報人泥滑滑  
況聞江上有風波

寒家諸父挽宗孫又與先人掃舊墳莫聽無稽長舌者  
浪言身在百花村

百花村裏錦成雲盡賣烏程若下春白面書生今漸老  
有誰年少肯留人

思家獨上仲宣樓何處青山是舊游便覓鯉魚先寄信

月圓時節大刀頭

右寄內

頻年收得慰安書  
畫餅難充腹內饑  
見說錦城無限好  
錦城雖好不如歸

聞君黑髮漸成皤  
誰信閨人白更多  
唱慣閭門楊柳曲  
無心來聽展戍歌

檀郎蹤跡似風蓬  
幾夜因緣在夢中  
不及天孫衾與枕  
一年猶得一相同



一燈一影共成三人問移天只自慙近報歸來非誑說  
便從牕下種宜男

十年隔別面如瓜無復容顏似舜華只恐到門初下馬  
一天愁悶悔還家

右代內答

黃栗妻

東海黃栗妻凌氏其夫遠出適海水泛漲里中  
豪民乘時逼脇使服役隄捍凌氏曰我為婦人

救死且不贍焉能事此豪民怒壞其室廬毀傷  
其薪木凌氏不得已遂自盡事在景泰閏年

天時人事總堪哀一婦難當兩樣災報與憂民巡撫使  
早騎驄馬火星來

其二

不因洪水為豪民逼向黃泉送此身巡撫到來煩說與  
一時似我尚多人

和鈍菴弔樂菴龍洲蓮峯半山四古墓

白頭村嫗白頭翁盛事驚看眼中可惜一杯江上土  
野花黃蝶領春風

一篇醉渡浙江詞不是尋常句讀詩空有故人三十萬  
等閒盡付酒家兒

泗園文脉接蓮峯姓氏曾收縣誌中只為書聲消歇久  
子孫誰免哭途窮

清江百里古名婁總管佳城此地留龍虎氣消君莫怨

新漕風景更多愁

新漕王葆墓

壽山中人

羔羊春酒雜仙桃  
兩鬢秋霜一布袍  
白鹿青驪來會者  
滑稽方朔最年高

題王同知梅花

少年頭角老成身  
一寸心中萬古春  
清白自然顏色好  
江南歌咏有詩人

古墓

野梅荒草水邊墳  
無處從人問子孫  
三尺斷碑今又失

幾多遺恨夕陽村

送老兵

劍光如火馬如飛  
破敵曾隨大將車  
斗酒巖肩常不飽  
胸中磊塊盡兵書

題呂推官鳳池春雨竹

鳳凰池上鳳凰翎  
帶雨離披舞舜庭  
分得一枝畱郡裏  
清風常滿節推廳

班姬

陽阿禍水灑塗椒從此劉家火漸消  
莫恃齊紈長在手  
西風容易到芭蕉

題徐氏隱居

南山楊柳北山桑山下人家禮義鄉  
攜取舊書辭舊隱  
願從東壁借餘光

題倦繡圖

暖籠雙袖暉雲鬟繡出鴛鴦帶  
笑看侍女不須猜倦倚  
玉纖水冷怯鍼寒

題爛柯圖

一局棋殘已爛柯  
仙家歲月信難過  
衣衫最是輕柔物  
不識當時爛幾何

喜故人子至

百年茅屋幾秋風  
已見高門在眼中  
況爾累累盡英物  
高曾元是漢于公

題黃生文藁

不識黃家玉樹枝  
偶於草藁見文辭  
若非沈老同菴裏

那得諸生有項斯

題梅花送沈太守之廣州

笑乘五馬向南天一路仁風捲瘴煙  
心比梅花更清白任教人說有貪泉

題小畫

楊柳村西野路荒渡頭風急水如湯  
客行不用憂狼虎只恐逢人變虎狼

宗能寓夏氏館暑夜以詩招之



故人清話類清標清似清風月下飄不及清風能自至  
故人須待寄詩邀

江行逢漁父

衣食年年半有無冷風寒雨在江湖長貧不為官家課  
盡送黃公舊酒壚

題倪元鎮雙樹小景

百年片紙非朋貝湖海收藏墨未昏金谷園中千萬樹  
不知留得幾株存

題菖蒲

抱持清節任清癯  
獨笑山花醉似泥  
欲寄楊家舊知己  
問誰驛使過關西

題雲山小隱

遠山雲白近山青  
竹裏茅齋水上亭  
常恐城中官客至  
帶將塵土汙階廳

讀張騫傳

漢家西域是誰開  
博望功成事可哀  
斷送壯夫知幾許

換將胡物過東來

讀歸去來辭

折腰懶向督郵前  
歸去還耕栗里田  
身到元嘉將十載  
夢魂只在義熙年

江鄉

江鄉酒熟黍離離  
蓴菜鱸魚正及時  
堪笑同行門外客  
月明烏鵲歎無枝

題劉龍洲像

長髯廣額酒杯深  
人物孤高月下岑  
七尺微軀三寸舌  
江湖形迹廟堂心

野雲

野雲如水湧如湯  
飛向遙天入渺茫  
人說野雲閒似我  
看來翻覺野雲忙

懷葉與中

三首

石浦橋頭少保家有田  
有宅有船車芙蓉黃菊開將遍  
白酒尊羹編荳茶

十畝金潼隔市塵  
水香地暖草如煙  
奉思菴外長松下  
明月清風不用錢

新買齋居近學宮  
傳家書籍儘堪容  
北牕又有娛情物  
三里青山百丈峯

題邵啓南橘軒

橘葉青青橘柚黃  
藥鑪茶竈盡生光  
寬衣大袖秋香裏  
一卷靈樞不下堂

其二

自古神仙事渺茫  
柳州橘井漸遺忘  
家傳只用君臣藥  
不慣單行施療方

懷孫紹先

兄弟當家子  
若林情懷偏向酒邊深  
里中惡少多相侮  
不設機關半點心

送查若庸下第東還

讀書不為科名讀  
若說科名誤此生  
請看草廬初讀起  
便知專不為科名

其二

浮名得失何須較實學盈虛當自強君有長才長十倍  
好於十倍更增長

平橋藁卷三

欽定四庫全書

平橋藁卷四

明 鄭文康 撰

五言律

春日偕龔工部過楊氏東郭草亭

小小茅亭下陰陰  
柳樹多町畦接城郭  
花卉近陽和  
閣老題詩在遊人  
載酒過坐聽灌園者  
時唱太平歌

過南溪翁莊



嘉樹繞崇垣清流映華門治生餘粟帛供祭足雞豚詩  
酒閒情寓衣冠古製存時時逢野老共話長兒孫

城南夜集

明月照高秋城南昨夜遊行厨依綠樹長席近河流鷗  
夢芙蓉渚漁燈杜若洲荒閒儘堪樂何必酒家樓

白屋

南京施進士題其讀書之處曰白屋蓋以公卿  
自期其期亦大矣雖然期其濟時行道可也期

其崇高富貴不可也予又知其所期已在此不在彼也

白屋無媒地春來亂草深  
席門風自動圭竇日長陰  
袖有匡時策詩皆治世音  
一朝登紫閣慎莫變初心

夏封君草堂

埋骨荒山下於今已廿年  
兩鷄雙白壁三世一青氊  
高行鄉人誦遺經弟子傳  
惟餘手栽樹長對草堂前

屯田

海上無烽火兵夫半入屯田廬皆得業雞犬自成村社  
飲翁歸舍春畊婦守門不知戎馬苦同荷主君恩

敲棋所

對客談兵處松風繞澗阿一枰消日月尺地起干戈世  
路機心險人情局面多莫教輕下著一錯更無何

代妹宜君哭彭餘璋

配偶是前緣從君未五年兩週雖有子半世已無天大  
義身徒在深恩骨可鐫吾家舊詩禮敢負栢舟篇

餘璋歿於正統癸亥十月六日此詩作於七日  
宜君死於十二日

送彭伴讀復任

藩府舊仙郎居官髻已蒼晨興時伴讀朝退謾徜徉殘  
雪皆征路寒山總異鄉平生遂良願長得事賢王

雲山

客路多岐阻經春復到秋雲山千里目風樹一天愁鴈  
影將心遠江聲帶淚流明年寒食飯歸去灑松楸

送張知縣之崇明

憐君新作宰邑在海東頭家近書頻寄官閒印早收魚  
鹽盈市肆蘆葦繞汀洲多少瘡痍者懸懸待爾瘳

思鄉

高堂有華髮何為貪遠遊每逢吳下客頻問海東頭官  
達固云樂餘生何足謀累累城下塚見說盡王侯

與諸公酌酒

燕趙多豪傑悲歌不暇裁素知黃祖性敢恃禰衡才酒

盡月將落燭殘風又來下階成獨步惆悵一興哀

哭邑宰鄭尊生

痛哭尊生老雙親尚在堂負心淹薄宦遺恨付諸郎綵  
戲樂難再錦封恩異常斷魂招不返先已到襄陽

其二

痛哭尊生老滎陽共祖姬謬看如拱壁相愛若連枝愴  
悌三年政和平十卷詩自憐多病者和淚斂君屍

病中

戊午京闈榜題名得頗先授官十載後賜告七年前  
貯陳情藁囊存歷俸錢君恩深未報病枕夜無眠

其二

先子多名譽人稱偉丈夫病奄千日久命向一朝殂封  
殮煩鄰友扶持付老奴此心遺恨在雙眼漸成枯

其三

羣妹皆同母諸甥日漸多每從賓塾散頻向舅家過聚  
立年相若同行氣總和情懷好傷感棠棣不成歌

其四

三子雖豚犬相看抵萬金  
父書期盡讀母線要關心  
靖節留詩久徐卿種德深  
二公歌詠在一夜一長吟

其五

宋駕南轅日移家海上峯  
華原王郡非謬譜顯肅后是同

宗世有儒書業門無酒保  
傭余生敢忘本書姓必開  
封

其六

從小稱知己當場總善文  
八閩廉憲副沈訥獨石老監軍



葉盛

氣味芝蘭合飛翔燕雀分近來消息杳惆悵賦停雲

其七

先祖留遺業山中有敝廬從教妻子累肯負聖賢書太

守

朱勝

知貧薄尚書

李敏

問起居若非守清節誰暇枉軒車

其八

七尺堂堂貌蹉跎髻欲秋讀書期事主杖策望封侯正  
大胸中學淒涼眼下愁老天如有意未必此生休

其九

病髮風前葉紅顏雨後花閉門思義士看劍想仇家久  
斷賓筵酒頻供石鼎茶草堂雖矮小日日望京華

其十

四十當強仕年來頓早衰髮將鬚共白手與足同痿風  
雨燒燈早晴明就枕遲愁懷憑紙筆寫出盡成詩

余有癖在右乳下已廿五年丙子臘月八日大  
作痛劇不省人事數日幸家人頗信區區平日  
之言所謂巫覡僧道課卜星算之類一切謝絕

此皆細君主之特附錄於詩尾天順元年正月  
識

病劇再韻

卧病四年備嘗百藥頭髮盡落三齒已脫近又  
增劇似將謝世因誦舊韻再作十首時天順三  
年己卯三月三日

百歲居人世歸休相後先莫嗟將死際請看未生前  
老固多壽石郎空富錢余生已如此玄谷欲長眠

其二

一癖成堅物四年為曠夫自矜春未晚誰道歲將徂頭  
似坐禪衲面如行丐奴青天降時雨還可潤焦枯

其三

斂含固塞東護屍良意多遭喪惟俗信講禮有誰過古  
制思收復今人事議和最憐相送醜前路擁笙歌

其四

鄒魯詩書語精如百鍊金古來三寶意亦說衆生心唐

室沙門盛中原地獄深蔓延不可解搔首獨呻吟

其五

最愛藏身處崇丘背遠峯哀哀羊叔子表表郭林宗刻  
誌錢宜備穿山力可傭行將營一室期與萬年封

其六

謬忝科名後操觚學綴文心思韓吏部夢寐鮑參軍草  
藁隨年積門生每卷分恐遺身後醜一火上凌雲

其七

里有狂巫宅人爭夜叩廬語言憑崇說符篆代神書左  
道恬無畏嘉名每自居西門懸望久何處候軒車

其八

花老不禁雨草衰偏怕秋繞山新土塚滿眼舊王侯大  
數有時盡細君終夜愁回頭笑相告飲泣且須休

其九

四時都市酒二月洛陽花日日常為念年年只在家婢  
丸燈下藥僧送火前茶到此方令悟無心老歲華

其十

百藥都嘗過連年不救衰  
艾經三日壯身覺十分痿  
擁被坐更永聽雞嫌曙遲  
自緣無睡苦不是愛吟詩

自笑

自笑乖崖子乖崖與衆違  
年荒飯不足病久客來稀  
檢歷傷人老調羹喜菜肥  
明年當五十只恐未知非

清逸

溷雜豈我事奔趨非我能  
身如臨水鶴心似出家僧  
入

竹雪堪聽採花蜂可憎夜來讀無逸不厭濁油燈

挽徐老翁

百歲實難致近之能幾人平生方寸地到老一腔春丈  
獻當時族衣冠太古民從今後來者何處望清塵

送郡庠生赴部

泮水游歌日於今已十年蹉跎天府榜迢遞客鄉船歲  
月當強仕文章得正傳高山須仰止只在范莊前

題倪公禮隱居



家近閭門市清風一草廬  
牕明人問卜山晚僕收書  
著老神龜守芸香宿蠹除  
靜眠過食肉徐步當乘車  
客笑鳩巢拙妻憐蟻甕虛  
城南炎熱地不識近何如

和鬼仙詩五十韻

有序

鬼仙者晉陵澄江人身長而癯步輕而趨言  
鑿鑿如截鐵為人才多藝於天下書無不  
讀於儒者事無不精雖小道雜沅賤技亦多  
能為之常往來江湖間其為文章不造草落

筆輒頃刻數千言不窮與客譚笑自如遇紙盡  
乃已或有並以紙者隨多寡亦復盡所益已而  
讀之畧不覺有重複窘迫語狀見者皆稱天才  
或求作古篆隸行書大小楷累數日不少倦各  
滿所欲而去性惡酒點滴不入口鮮鱗肥肉亦  
不御蔬食之外日惟啜茗茗數十甌獨好服飾  
華麗坐此不免為小丈夫所議天順六年夏五  
月歿於北京僧舍秋官郎陸君孟昭買棺葬之

今年春往往於故舊家假筆道平生叙契闊賦  
詩歌大意以離塵寰麗真府為樂嘗有五言詩  
五十韻寄余及汝南周德元章末曰招魂煩鄭  
賦降筆冀周傳倘得千金諾啣環報二賢人錄  
至余所讀之不覺淒然淚數行下因念素辱愛  
厚許與獎借每勞動於口舌之餘幽明隔絕愧  
負愧負茲者安敢無言以答雅情敬依用韻次  
第和就聊當招魂之賦第篇中韻同者四句豈

陰冥別有體製與人世間不同耶不然何生  
前信手累百韻而無此失也然終不敢以此  
自解輒敢忘其固陋僭取四字可以承接詞  
義者易之不審可否原韻五十有一題稱書  
懷五十韻寄介菴易軒二公此舉成數無害  
也鬼仙周氏曰慎菴曰呆拙子曰江湖散人  
皆其別號云


憶昔初道贄雞盟訂自天姓名雖久識邑里各相

懸傾蓋衷腸合分襟夢寐連奇才駭神鬼浮議謗  
迤邐翠羽悲鸚鵡紅顏落杜鵑瘦因梁肉減忙為  
藝文纏暑閣朝橫膝寒齋夜聳肩扇搖倭國紙被  
擁日南綿寶玉深藏璞驪珠暗在淵未逢宣室召  
甘向茂陵眠經史心俱醉王公眼盡憐長庚重孕  
白司馬復生遷踪蹟多方到風波幾處全反躬  
思寡悔搔首動追愆路口彈長鈇江心補漏船  
自緣三島謫敢望九霄騫雅操堅如石生辰薄

似磚四時恒暘若雙眼獨醒然燕寢凝香處清霜點鬢  
年詞章誇敏捷篆籀擅窮研夢繞江湖上身依客旅邊  
韜光封鏡匣病緩佩弓弦孤比懸崖竹清同出水蓮放  
歌來樹底舒嘯立山巔命僕呼聲煦逢人禮貌虔煙霞  
成痼疾筆硯是良田到處詩名播誰家酒債牽樓船粧  
雪洞白馬覆紅氍纓濯滄浪水茶烹義井泉土坯揮鋤  
楮木偶視豪權噦噦丹山鳳行行陸地仙蓬瀛三萬里  
錦繡幾千篇厭俗常居寺談空慣問禪善書修殿記不

受賣丈錢誤愛予多幸相過意每專時從雞黍約共話  
結交緣畏飲杯浮毒雄談鼎沸煎書筒踈未久計札報  
何遑仙子形骸蛻臺郎道義堅斂含依法制冠履擇新  
鮮精爽還鄉里悲愁滿市廛貞妻渾欲死令女半成顛  
天泣霜華降風號樹影偏仙班仍入籍靈性了無眩神  
逐鷺箱下旛隨鶴駕旋藥方真索隱詩句愈鉤玄海鳥  
歸華表門生掃墓阡沈沈寒食雨澹澹夕陽煙已說登  
佳境無勞歎逝川招魂今日賦遺事後人傳正直聰明

者皇天不負賢





平橋橐卷四